

**BOSNA I HERCEGOVINA  
FEDERACIJA BOSNE I HERCEGOVINE  
VLADA**

**N A C R T**

**Z A K O N  
O LIKVIDACIONOM POSTUPKU**

**Sarajevo, august 2018. godine**

## ZAKON O LIKVIDACIONOM POSTUPKU

### I - OSNOVNE ODREDBE

#### Član 1. (Predmet zakona)

Ovim zakonom uređuje se likvidacioni postupak pred nadležnim sudovima u Federaciji Bosne i Hercegovine, u postupku likvidacije pravnog lica.

#### Član 2. (Svrha i predmet likvidacionog postupka)

(1) Likvidacioni postupak se provodi nad pravnim licima. On služi potpunom namirenju svih povjerilaca pravnog lica unovčenjem njegove imovine.

(2) Nakon provedene likvidacije i namirenja povjerilaca, preostala imovina pravnog lica dijeli se članovima srazmjerno njihovom učešću u vlasništvu.

#### Član 3. (Nadležni sud)

Likvidacioni postupak provodi sud koji je prema Zakonu o stečajnom postupku nadležan za vođenje stečajnog postupka.

#### Član 4. (Primjena Zakona o stečaju)

(1) Odredbe Zakona o stečaju shodno se primjenjuju i na postupak likvidacije, ako ovim zakonom nije drugačije određeno.

(2) U postupku likvidacije neće se primjenjivati odredbe Zakona o stečaju kojima se uređuje:

- 1) restrukturiranje i reorganizacija dužnika,
- 2) skupština i odbor povjerilaca,
- 3) pobijanje pravnih radnji,
- 4) ročište za glavnu diobu.

#### Član 5. (Vrste likvidacionog postupka)

Likvidacioni postupak se provodi:

- 1) Prinudnom likvidacijom,
- 2) Dobrovoljnom likvidacijom,
- 3) Likvidacija po službenoj dužnosti,
- 4) Drugim slučajevima utvrđenim zakonom.

Član 6.  
(Prinudna likvidacija)

- (1) Prinudna likvidacija se pokreće ako je pravnom licu izrečena mjera zabrane obavljanja djelatnosti pravosnažnim rješenjem nadležnog organa ili rješenjem suda zbog neispunjavanja uslova za obavljanje djelatnosti, a u roku određenom u izrečenoj mjeri ne ispuni te uslove, odnosno ne promijeni djelatnost ili je izrečena mjera trajne zabrane obavljanja djelatnosti.
- (2) Prijedlog za prinudnu likvidaciju pokreće nadležni organ koji je donio rješenje kojim je izrečena mjera zabrane obavljanja djelatnosti.
- (3) Ukoliko sud donese mjeru zabrane djelatnosti pravnom licu, prijedlog za prinudnu likvidaciju podnosi nadležni organ koji je pokrenuo postupak sa izricanjem mjere zabrane obavljanja djelatnosti.

Član 7.  
(Dobrovoljna likvidacija)

- (1) Dobrovoljna likvidacija se provodi na osnovu odluke skupštine pravnog lica.
- (2) Prijedlog za pokretanje dobrovoljne likvidacije podnosi član društva ili zakonski zastupnik.

Član 8.  
(Likvidacioni postupak po službenoj dužnosti)

Likvidacioni postupak po službenoj dužnosti se pokreće dostavom likvidacionom sudu pravosnažnog rješenja registarskog suda kojim je utvrđen prestanak društva nakon isteka roka na koje je društvo osnovano ili društvo nije izvršilo usklađivanje sa Zakonom o privrednim društvima ili ako je pravosnažnom odlukom suda utvrđena ništavost upisa osnivanja u sudski registar pravnog lica.

Član 9.  
(Pokretanje likvidacije u drugim slučajevima)

Ukoliko je u drugim slučajevima utvrđenim zakonom predviđeno pokretanje likvidacionog postupka, prijedlog podnose subjekti određeni tim zakonom.

## **II - ORGANI LIKVIDACIONOG POSTUPKA**

Član 10.  
(Organi likvidacionog postupka)

Organi likvidacionog postupka su: likvidacioni sudija i likvidator.

Član 11.  
(Likvidacioni sudija)

- (1) Likvidacioni sudija vodi i upravlja likvidacionim postupkom od podnošenja prijedloga za provođenje likvidacionog postupka do zaključenja likvidacionog postupka.
- (2) Likvidacioni sudija ima prava i obaveze u skladu sa odredbama ovog zakona.
- (3) Likvidacioni sudija imenuje i razrješava likvidatora, te vrši pravni nadzor nad njim, u skladu sa odredbama ovog zakona.

Član 12.  
(Likvidator)

Za likvidatora sud može imenovati: članove uprave društva upisane u sudski registar poslovnih subjekata na prijedlog predlagača ili stečajne upravnike sa liste stečajnih upravnika Federacije Bosne i Hercegovine (u daljem tekstu: Federacije).

Član 13.  
(Prava likvidatora)

- (1) Likvidator stiče svojstvo zakonskog zastupnika pravnog lica danom donošenja rješenja o imenovanju.
- (2) Likvidator se potpisuje za pravno lice, pri čemu mora navesti firmu pravnog lica i naznaku da se nalazi u likvidaciji.

Član 14.  
(Obaveze likvidatora)

- (1) Likvidator je dužan odmah nakon stupanja na dužnost, a u roku od 30 dana od dana imenovanja, sudu dostaviti i to:
  - a) popis imovine,
  - b) popis povjerilaca,
  - c) početni likvidacijsko-finansijski bilans,
  - d) uvjerenje Porezne uprave Federacije Bosne i Hercegovine o izmirenim poreznim obavezama,
  - e) uvjerenje Uprave za indirektno oporezivanje Bosne i Hercegovine o izmirenim poreznim obavezama,
  - f) potvrda Centralne banke Bosne i Hercegovine, ne starija od osam dana od dana podnošenja prijedloga za pokretanje likvidacionog postupka o solventnosti transakcijskog računa poslovnog subjekta.

- (2) Likvidator je dužan prilikom dostave sudu popisa imovine, početnog bilansa i popisa povjerilaca, pisanom izjavom garantovati tačnost i potpunost podataka.

Član 15.  
(Razrješenje likvidatora)

Likvidacioni sudija može razriješiti imenovanog likvidatora ukoliko:

1. ne ispunjava obaveze iz člana 14. ovog zakona,
2. ne dostavlja izvještaje,
3. ne unovčava imovinu,
4. neosnovano odugovlači provođenje pojedinih radnji,
5. daje netačne podatke,
6. i u drugim slučajevima po ocjeni suda.

Član 16.  
(Naknada troškova i nagrada za rad likvidatora)

- (1) Likvidator, izuzev člana uprave društva, ima pravo na primjerenu naknadu troškova i nagradu za rad.
- (2) Naknadu troškova i nagradu za rad određuje sud u skladu sa propisom o nagradama i naknadama za likvidatore, koji donosi Federalno ministarstvo pravde.

Član 17.  
(Odgovornost likvidatora)

Likvidator lično odgovara za skrivenu povredu svoje obaveze da imovinu unovči što je najbolje moguće i prikupljeni iznos podijeli povjericima.

Član 18.  
(Polaganje računa o radnjama likvidatora)

Likvidator je dužan na traženje suda, ali najkasnije sa okončanjem postupka diobe, položiti račun o svojim radnjama i sudu predati pismene potvrde na provjeru.

Član 19.  
(Odgovornost za štetu)

- (1) Nakon što je pravno lice brisano iz registra, ne mogu se pobijati radnje likvidatora, ali povjerioci mogu od njega tražiti da im nadoknadi štetu koju im je tim svojim radnjama prouzrokovao.
- (2) Likvidator odgovara za štetu prouzrokovanu u toku likvidacionog postupka do visine peterostrukog iznosa nagrade koju je primio za svoj rad.

- (3) Ne smatra se štetom ako povjerilac blagovremeno ne prijavi svoje potraživanje za koje likvidator nije znao, niti je mogao znati. Ako to ne bi bilo dovoljno za namirenje štete koja je nastala povjeriocu usljed radnje likvidatora, za nju solidarno odgovaraju svi članovi pravnog lica do visine imovine koja im je isplaćena ili preostala nakon zaključenja likvidacionog postupka.
- (4) Odredbe iz stava (3) ovog člana ne primjenjuju se na odgovornost likvidatora prema članovima pravnog lica. Za tu štetu likvidator odgovara po općim pravilima o odgovornosti za štetu.
- (5) Zahtjev za odgovornost za štetu zastarijeva prema likvidatoru u roku od godinu dana od dana brisanja poslovnog subjekta iz registra.

### III - OPĆE PROCESNE ODREDBE

#### Član 20. (Likvidacioni postupak)

- (1) Likvidacioni postupak provodi nadležni sud na čijem području je sjedište pravnog lica.
- (2) Likvidacioni postupak je hitan, kao i svi postupci u kojima je likvidacioni dužnik stranka u postupku.
- (3) U likvidacionom postupku ne može se tražiti povrat u prijašnje stanje, niti podnositi prijedlog za ponavljanje postupka, niti izjaviti revizija.

#### Član 21. (Odluke suda)

- (1) Odluke u likvidacionom postupku donose se u obliku rješenja ili zaključka.
- (2) Zaključkom se izdaje nalog za izvršenje pojedinih radnji.
- (3) Rješenja o otvaranju i zaključenju likvidacionog postupka objavljuju se na oglasnoj ploči suda i na internet stranici suda, osim ako ovim zakonom nije drugačije propisano.

#### Član 22. (Pravo na žalbu)

- (1) Protiv rješenja može se izjaviti žalba, ako ovim Zakonom nije drugačije određeno.
- (2) Rok za žalbu je osam dana, od dana dostavljanja rješenja.

- (3) Početak roka za izjavljivanje žalbe za treća lica koja imaju pravni interes teče nakon isteka pet radnih dana od dana objave rješenja na oglasnoj ploči suda i na internet stranici suda.
- (4) Ako je ovim zakonom propisano da se rješenje mora dostaviti određenim licima, rok za izjavljivanje žalbe teče od dana dostavljanja rješenja.
- (5) Protiv zaključka se ne može izjaviti žalba niti prigovor.

#### **IV - TOK LIKVIDACIONOG POSTUPKA – DOBROVOLJNA LIKVIDACIJA**

##### **Član 23. (Pokretanje postupka)**

- (1) Likvidacioni postupak se pokreće podnošenjem prijedloga nadležnom sudu.
- (2) Prijedlog za pokretanje likvidacije se podnosi na obrascu koji će propisati federalni ministar pravde.

##### **Član 24. (Odluke uz prijedlog)**

Uz prijedlog za pokretanje likvidacionog postupka sudu predlagač dostavlja odluku o prestanku poslovnog subjekta ili pravosnažno rješenje nadležnog organa kojim je izrečena zabrana obavljanja djelatnosti, ili rješenje nadležnog registarskog suda kojim je utvrđen prestanak ili pravosnažnu odluku nadležnog organa kojom je utvrđen prestanak poslovnog subjekta.

##### **Član 25. (Dostava dokumentacije uz prijedlog)**

- (1) Uz prijedlog za pokretanje likvidacionog postupka dostavlja se i:
  - a) aktuelni izvod iz sudskog registra,
  - b) uvjerenje Poreske uprave o izmirenim poreskim obavezama, ne starije od 15 dana od dana donošenja prijedloga za pokretanje likvidacionog postupka,
  - c) uvjerenje Uprave za indirektno oporezivanje BiH o izmirenim indirektnim poreskim obavezama, ne starije od 15 dana od dana donošenja prijedloga za pokretanje likvidacionog postupka,
  - d) potvrda Centralne banke BiH, ne starije od osam dana od dana podnošenja prijedloga za pokretanje likvidacionog postupka o solventnosti transakcijskog računa poslovnog subjekta,
  - e) finasijske izvještaje o poslovanju.

Član 26.  
(Uređenje i dopuna prijedloga)

(1) Ukoliko predlagač ne dostavi prijedlog u skladu sa članom 24. i članom 25. stav (1) ovog zakona sud će zaključkom pozvati predlagatelja da u roku od 15 dana od dana dostavljanja zaključka uredi i dopuni prijedlog.

(2) Ukoliko predlagač ne postupi u skladu sa stavom (1) ovog člana sud će rješenjem prijedlog odbaciti.

(3) Protiv rješenja o odbacivanju prijedloga predlagač ima pravo žalbe.

Član 27.  
(Izmjena rješenja)

Nadležni likvidacioni sud može izmjeniti svoje rješenje ako su uz žalbu priloženi dokumenti i isprave kojima se ispunjavaju uslovi iz člana 24. i 25. ovog zakona.

Član 28.  
(Predujam)

(1) Predlagač je obavezan da uplati predujam u iznosu koji odredi sud za pokriće troškova postupka.

(2) Ako predlagač ne uplati predujam u roku od 8 dana od dana dostavljanja poziva za pokriće troškova postupka, likvidacioni sudija će rješenjem odbaciti prijedlog.

(3) Protiv rješenja o odbacivanju prijedloga predlagač ima pravo na žalbu.

Član 29.  
(Rješenje o otvaranju likvidacionog postupka)

(1) Nakon što sud razmotri prijedlog za pokretanje likvidacionog postupka i utvrdi osnovanost prijedloga, sud donosi rješenje o otvaranju likvidacionog postupka i imenuje likvidatora.

(2) Rješenje o otvaranju likvidacionog postupka sadrži:

- a) firma, sjedište i MBS pravnog lica, te identifikacioni broj poreznog obveznika i oznaka „u likvidaciji“,
- b) ime i adresu likvidatora,
- c) poziv povjeriteljima da u roku od 30 dana od dana objavljivanja rješenja, u skladu sa članom 21. stav (3) ovog zakona prijave sudu svoja potraživanja uz pouku da ukoliko u ostavljenom roku niko od povjerilaca ne prijavi potraživanje sud će likvidacioni postupak zaključiti,
- d) nalog likvidatoru da postupi u skladu sa članom 14. ovog zakona,
- e) nalog sudskom registru poslovnih subjekata da izvrši upis zabilježbe rješenja o otvaranju likvidacionog postupka sa naznakom „u likvidaciji“, te brisanje ostalih lica upisanih u sudskom registru koja su ovlaštena za zastupanje i



- upis likvidatora,
- f) mjesto, dan i vrijeme ročišta za ispitivanje potraživanja.
- g) troškovi postupka.

(3) Dispozitiv rješenja objavljuje se u skladu sa članom 21. stav (3) ovog zakona.

(4) Rješenje o otvaranju likvidacionog postupka likvidacioni sudija će po službenoj dužnosti dostaviti sudskom registru.

#### Član 30.

(Pravne posljedice otvaranja likvidacionog postupka)

(1) Danom donošenja rješenja o otvaranju likvidacionog postupka prekidaju se svi postupci u kojima je likvidacioni dužnik stranka u postupku.

(2) Ovlaštenja licima ovlaštenim za zastupanje prestaju danom donošenja rješenja o otvaranju likvidacionog postupka.

#### Član 31.

( Obustava postupka)

(1) Ukoliko likvidator ne postupi u roku i na način propisan članom 14. ovog zakona, sud će ga zaključkom pozvati da u dodatnom roku od 15 dana od dana dostavljanja zaključka, postupi na način propisan članom 14. ovog zakona

(2) Zaključak iz stava (1) ovog člana sud će dostaviti na adresu sjedišta pravnog lica.

(3) Ukoliko likvidator ne postupi ni u naknadnom roku, sud će donijeti rješenje o obustavi likvidacionog postupka. U slučaju obustave likvidacionog postupka pravne posljedice otvaranja likvidacionog postupka ostaju na snazi.

#### Član 32.

(Ispitivanje prijava potraživanja)

(1) Na ročištu za ispitivanje prijava potraživanja (ispitnom ročištu) likvidator će se izjasniti da li priznaje potraživanje ili ga osporava.

(2) Ukoliko je prijava potraživanja osporena od strane likvidatora, sud će povjerioca uputiti da može pokrenuti parnicu radi utvrđenja osnovanosti potraživanja. Parnicu je dužan pokrenuti u roku od 15 dana od dana održavanja ročišta za ispitivanje potraživanja.

#### Član 33.

(Zaključivanje likvidacionog postupka)

Ako se niko od povjerilaca ne prijavi u roku utvrđenom u članu 29. stav (2) tačka c) ovog zakona, na prijedlog likvidatora i nakon što likvidator da izjavu kojom jamči da likvidacioni dužnik nema obaveza, sud će zaključiti likvidacioni postupak.

Član 34.  
(Preuzimanje imovine)

(1) Likvidator je dužan bez odlaganja ući u posjed imovine pravnog lica i ovlašten je i obavezan na unovčenje imovine. Prava trećih lica na predmetima i pravima imovine se moraju uzeti u obzir.

(2) Prije unovčenja imovine likvidator je dužan izvršiti procjenu nekretnina i pokretni stvari značajnije vrijednosti, putem ovlaštenog sudskog vještaka.

Član 35.  
(Unovčenje nepokretnosti bez tereta)

(1) Prodaja nepokretnosti koje nisu opterećene teretima (slobodna imovina) vrši likvidator javnim nadmetanjem, javnim prikupljanjem ponuda i neposrednom pogodbom.

(2) Likvidator sa kupcem zaključuje ugovor o prodaji nekretnine notarski obrađen, te istog uvodi u posjed nekretnine.

(3) Ukoliko se nepokretnost ne proda na način propisan u stavu (1) ovog člana prodaja će se izvršiti u skladu sa članom 36. ovog zakona.

Član 36.  
(Unovčavanje nepokretnosti sa teretima)

(1) Ako je nepokretnost opterećena razlučnim pravom, unovčava se javnim nadmetanjem, javnim prikupljanjem ponuda i neposrednom pogodbom.

(2) U oglasu o prodaji nepokretnosti likvidator objavljuje vrijednost nepokretnosti, način prodaje i uslove prodaje.

(3) Na prvoj javnoj prodaji nepokretnost se ne može prodati ispod 1/2 procijenjene vrijednosti, a na drugoj javnoj prodaji ispod 1/3 procijenjene vrijednosti.

(4) Ako se ne uspije unovčiti nepokretnost sa teretom na dvije javne prodaje, postupak prodaje se ne obustavlja.

(5) Ako se nepokretnost nije mogla unovčiti po cijeni određenoj u stavu 3. ovog člana, na svakoj narednoj javnoj prodaji najniža cijena po kojoj se nepokretnost može unovčiti smanjuje se za 10% od prethodne vrijednosti.

(6) Za prodaju nepokretnosti sa teretom javnim nadmetanjem ili javnim prikupljanjem ponuda ili neposrednom pogodbom, potrebna je saglasnost razlučnog povjerioca.

(7) Ukoliko je nepokretnost opterećena teretima sud će na prijedlog likvidatora nakon prodaje rješenjem naložiti brisanje tereta.

Član 37.  
(Zaključenje ugovora i brisanje tereta)

(1) Nepokretnosti unovčava likvidator, koji sa kupcem koji izlicitira odnosno ponudi i uplati najvišu cijenu, zaključuje kod notara ugovor o kupoprodaji i na kupca prenosi prava na nepokretnostima, te istog uvodi u posjed nepokretnosti.

(2) Ako je nepokretnostima opterećena teretima sud će na prijedlog likvidatora rješenjem naložiti brisanje tereta.

(3) Odredbe čl. 35 do 37. ovog zakona, shodno se primjenjuju na prodaju brodova, aviona, te prava upisanih u javnim evidencijama.

**Član 38.**  
(Obezbjeđenje prodaje (depozit))

(1) Obezbjeđenje (depozit) prodaje određuje likvidator i isti ne može iznositi više od 10% procijenjene vrijednosti predmeta prodaje, s tim da taj iznos ne može biti veći od 50.000 KM.

(2) Obezbjeđenje (depozit) ne vraća se kupcu koji je izlicitirao i prihvatio kupoprodajnu cijenu, a nije je uplatio u određenom roku.

**Član 39.**  
(Prodaja pokretnih stvari)

Likvidator će unovčiti pokretne stvari bez tereta javnim nadmetanjem, javnim prikupljanjem ponuda i neposrednom pogodbom, ako pokretna stvar ima u svom posjedu.

**Član 40.**  
(Unovčavanje pokretnih stvari i prava na kojima postoji razlučno pravo)

(1) Likvidator može unovčiti pokretne stvari na kojima postoji razlučno pravo javnim nadmetanjem, javnim prikupljanje ponuda i neposrednom pogodbom, ako pokretnu stvar ima u svom posjedu i ako za taj način unovčenja dobije saglasnost razlučnog povjerilaca.

(2) Likvidator može naplatiti ili na drugi način unovčiti potraživanje koje je likvidacioni dužnik ustupio ili založio radi obezbjeđenja nekog prava.

(3) Ako likvidator ima pravo na unovčenje pokretne stvari, u skladu sa stavom (1) ovog člana, dužan je razlučnom povjeriocu na njegov zahtjev dati obavještenje o stanju pokretne stvari ili dozvoliti da povjerilac razgleda pokretnu stvar.

(4) Ako je likvidator ovlašten za naplatu potraživanja, u skladu sa stavom (2) ovog člana, dužan je razlučnom povjeriocu na njegov zahtjev dati obavještenje o potraživanju.

(5) Umjesto obavještenja, likvidator može povjeriocu dozvoliti uvid u knjige i poslovnu dokumentaciju likvidacionog dužnika.

**Član 41.**  
(Obavijest o namjeri otuđenja)

(1) Prije nego što likvidator otuđi trećem licu pokretnu stvar ili pravo na čije unovčavanje je ovlašten, u skladu sa članom 36. ovog zakona, dužan je razlučnog povjerioca obavijestiti na koji način namjerava da otuđi pokretnu stvar.

(2) Likvidator je dužan povjeriocu dati priliku da u roku od osam dana predloži povoljnije unovčavanje pokretne stvari uz predočavanje konkretne ponude sa uputom na platežnu sposobnost kupca.

(3) Ako razlučni povjerilac u roku iz stava (2) ovog člana ili blagovremeno prije otuđenja predloži povoljniju mogućnost unovčavanja, likvidator je dužan da iskoristi

mogućnost unovčavanja koju je naveo povjerilac ili da unovči pokretnu stvar tako da ne ošteti razlučnog povjerioca.

(4) Unovčavanje se, osim načina unovčavanja iz stava (2) ovog člana, može izvršiti na način da razlučni povjerilac preuzme pokretnu stvar ako to nije suprotno interesima drugih povjerilaca.

#### Član 42.

(Podjela ostvarenog iznosa kod pokretnih stvari na kojim postoji razlučno pravo)

(1) Nakon što likvidator proda pokretnu stvar na kojoj postoji razlučno pravo ostvareni iznos od prodaje se najprije koristi za namirenje troškova likvidacionog postupka, a ostatak ostvarenog iznosa koristi se za namirenje razlučnih povjerilaca bez odgađanja.

(2) Ako je pokretnu stvar na kojoj postoji razlučno pravo likvidator prenio na povjerioca, povjerilac je obavezan da uplati iznos koji je potreban za namirenje troškova likvidacionog postupka.

(3) Ako je zbog unovčavanja iz stava (2) ovog člana likvidaciona masa opterećena porezom, iznos poreza pridodaje se troškovima unovčavanja.

#### Član 43.

(Zaštita povjerioca od odugovlačenja unovčavanja)

(1) Ako je likvidator ovlašten za unovčavanje stvari na kome postoji razlučno pravo i ako s namjerom odugovlači unovčavanje nakon ročišta, na prijedlog razlučnog povjerioca će se iz likvidacione mase nadoknaditi gubitak vrijednosti njegovog udjela u unovčavanju.

(2) Ako dođe do isplate štete razlučnom povjeriocu iz likvidacione mase, zbog razloga iz stava (1) ovog člana, ostali povjerioci mogu tražiti da likvidator nadoknadi štetu ostalim povjeriocima.

#### Član 44.

(Unovčavanje pokretnih stvari na kojima postoji razlučno pravo od strane povjerioca)

(1) Povjerilac je ovlašten za unovčavanje pokretne stvari ili potraživanja na kojima postoji razlučno pravo ako pokretnu stvar ima u posjedu ili ako je likvidator prepustio potraživanje na unovčavanje.

(2) Povjerilac je dužan pokretne stvari unovčiti u skladu članom 36. ovog zakona.

(3) Likvidator može odrediti rok unutar kojeg povjerilac mora unovčiti pokretnu stvar s tim da nakon proteka roka pravo na unovčavanje pokretne stvari stiče likvidator.

#### Član 45.

(Dioba)

(1) Iz likvidacione mase likvidator je dužan prvo izmiriti troškove likvidacionog postupka.

(2) Ukoliko su potraživanja povjerilaca za koje ne postoji izvršni naslov sporna, sud tog povjerioca upućuje da pokrene parnicu radi utvrđivanja osnovanosti potraživanja, u roku od 15 dana od dana održavanja ročišta za ispitivanje potraživanja. Ako povjerilac

u ostavljenom roku pokrene parnicu, likvidator je dužan prilikom diobe obezbijediti sredstva radi eventualne isplate te obaveze.

(3) Ukoliko povjerilac u ostavljenom roku ne pokrene parnicu iz stava (2) ovog člana, njegovo se potraživanje prilikom diobe neće uzeti u obzir i smatrat će se da se povjerilac odrekao ovog prava.

(4) Likvidator nakon unovčenja imovine, u potpunosti namiruje potraživanja svih povjerilaca ukoliko je likvidaciona masa dovoljna za namirenje svih potraživanja.

(5) Ako likvidator na osnovu prijavljenih potraživanja utvrdi da imovina poslovnog subjekta nije dovoljna da se podmire sva potraživanja povjerilaca, likvidator je dužan predložiti da se postupak likvidacije obustavi i pokrene stečajni postupak.

(6) O prijedlogu likvidatora za obustavu likvidacionog postupka i provođenju stečajnog postupka, sud će odlučiti rješenjem nakon izjašnjenja prisutnih povjerilaca na ročištu za ispitivanje povjerilaca,

(7) Protiv ovog rješenja nije dozvoljena žalba.

(8) Likvidator odgovara za štetu koju povjeriocima ili članovima pravnog lica nanese zbog nepodošenja ili zakašnjenja podnošenja prijedloga za otvaranje stečajnog postupka.

#### Član 46.

(Obaveza podnošenja izvještaja i polaganje računa)

Nakon okončanog postupka diobe likvidator će dostaviti izvještaj o svim radnjama provedenim tokom postupka sa dokazima o izvršenom namirenju povjerilaca, likvidacijsko-finansijski bilans i izvještaj o troškovima postupka.

#### Član 47.

(Rješenje o zaključenju likvidacionog postupka)

(1) Nakon podnošenja izvještaja iz člana 46. ovog zakona, sud će donijeti rješenje o zaključenju likvidacionog postupka i razrješenju likvidatora, te naložiti brisanje poslovnog subjekta iz sudskog registra.

(2) Rješenje o zaključenju likvidacionog postupka objavljuje se shodno članu 21. stav 3. ovog zakona.

#### Član 48.

(Brisanje iz registra)

Po pravosnažnosti rješenja o zaključenju likvidacionog postupka sud će rješenje dostaviti registru poslovnih subjekata radi brisanja.

## **V - SKRAĆENI DOBROVOLJNI LIKVIDACIONI POSTUPAK**

Član 49.  
(Skraćeni dobrovoljni likvidacioni postupak)

- (1) Skraćeni dobrovoljni likvidacioni postupak pokreće se podnošenjem prijedloga za provođenje dobrovoljnog likvidacionog postupka u skraćenom postupku.
- (2) Uz prijedlog iz stava (1) ovog člana prilaže se:
- 1) odluka o dobrovoljnoj likvidaciji u skraćenom postupku,
  - 2) notarski ovjerenu izjavu ortaka, članova ili dioničara da su izmirene sve obaveze prema povjericima, uključujući obaveze prema radnicima i da se slažu sa time da bude proveden skraćeni dobrovoljni likvidacioni postupak,
  - 3) aktuelni izvod iz sudskog registra,
  - 4) potvrdu Centralne banke Bosne i Hercegovine ne stariju od osam dana od dana podnošenje prijedloga za pokretanje skraćenog dobrovoljnog likvidacionog postupka,
  - 5) uvjerenje Poreske uprave o izmirenim poreskim obavezama ne starije od 15 dana od dana podnošenje prijedloga za pokretanje skraćenog dobrovoljnog likvidacionog postupka,
  - 6) uvjerenje Uprave za indirektno oporezivanje BiH o izmirenim indirektnim poreskim obavezama ne starije od 15 dana od dana podnošenje prijedloga za pokretanje skraćenog dobrovoljnog likvidacionog postupka,
  - 7) posljedni finansijski izvještaj sačinjen i prezentovan u skladu sa zakonom kojim se reguliše računovodstvo i revizija,
  - 8) izjavu ortaka, članova ili dioničara o popisu imovine sa dokazima, uz prijedlog raspodjele imovine prema vlasničkim udjelima,
  - 9) dokaz o uplaćenim sredstvima na ime objave oglasa o donošenju rješenja o otvaranja i zaključenju likvidacionog postupka u „Službenom novinama Federacije BiH“,
  - 10) akt nadležnog organa kojim je dato ovlaštenje licu koje će preduzimati radnje i primati pismena u skraćenom dobrovoljnom likvidacionom postupku.
- (3) Obrazac prijedloga za pokretanje skraćenog dobrovoljnog likvidacionog postupka i obrazac izjave iz stava (1) tačka 2) ovog člana, za skraćeni dobrovoljni likvidacioni postupak propisuje se propisom, koji donosi Federalni ministar pravde.

Član 50.  
(Utvrđivanje ispunjenosti uslova)

- (1) Nakon što sud utvrdi da su ispunjeni uslovi iz člana 48. ovog zakona, sud donosi rješenje o otvaranju i istovremenom zaključenju likvidacionog postupka, te po pravosnažnosti rješenja nalaže se brisanje društva iz registra.
- (2) Rješenje iz stava (1) ovog člana se objavljuje na oglasnoj tabli suda, a dok se oglas o donošenju rješenja o otvaranju i istovremenom zaključenju likvidacionog postupka objavljuje u „Službenom novinama Federacije BiH“, uz napomenu da je rješenje objavljeno na oglasnoj tabli suda u neprekidnom trajanju od 30 dana.
- (3) Povjerioci i druga lica koja imaju pravni interes, mogu izjaviti žalbu u roku od 30 dana u skladu sa članom 22. ovog zakona.
- (4) Ako se na rješenje iz stava (1) ovog člana uloži žalba, rješenje će prestati da važi u cijelosti, što se objavljuje na oglasnoj tabli suda, dok se oglas o odluci suda objavljuje u „Službenom novinama Federacije BiH“ uz napomenu da je rješenje objavljeno na oglasnoj tabli suda u neprekidnom trajanju od 30 dana.

Član 51.  
(Nastavak redovnog likvidacionog postupka)

- (1) Sud će nastaviti postupak po pravilima redovnog likvidacionog postupka, ako predlagač po pozivu suda uplati potreban iznos sredstava na ime predujma troškova postupka.
- (2) Ako predlagač ne uplati predujam troškova sud će rješenjem pozvati zainteresovano lice (povjerioce i druge), koji su svoj interes iskazali u žalbi, da predujme sredstva na ime troškova postupka.
- (3) Ako niko od pozvanih lica ne uplati predujam troškova sud će rješenjem prijedlog za pokretanje likvidacionog postupak odbaciti.

Član 52.  
(Odgovornost članova)

- (1) Lica koja su dala ovjerenu izjavu iz člana 48. stav (1) tačka 2) ovog zakona, odgovaraju neograničeno solidarno za obaveze pravnog lica tri godine nakon brisanja iz registra.
- (2) Društvo koje prestaje po skraćenom postupku, briše se iz registra uz upisivanje u registar ličnih imena, jedinstvenog matičnog broja i adresa članova društva fizičkih lica, odnosno naziva, sjedišta i matičnog broja članova pravnih lica, s naznačenjem neograničene solidarne odgovornosti za obaveze brisanog društva, u roku iz stava (1) ovog člana.

Član 53.  
(Raspodjela likvidacione mase)

- (1) Likvidaciona masa će se po pravosnažnosti rješenja iz člana 49. stav (1) ovog zakona raspodjeliti članovima prema vlasničkim udjelima,
- (2) Ako su članovi donijeli odluku o raspodjeli likvidacione mase, raspodjela će se vršiti u skladu sa odlukom o raspodjeli likvidacione mase.

## **VI - LIKVIDACIJA PO SLUŽBENOJ DUŽNOSTI**

Član 54.  
(Tok postupka)

(1) Nakon dostave likvidacionom sudu rješenja kojim je utvrđen prestanak ili utvrđena ništavost upisa osnivanja poslovnog subjekta sud će u roku od 15 dana od dana prijema rješenja oglasom pozvati likvidacionog dužnika da u roku od 30 dana od dana objave oglasa obavijesti sud o imovini i ujedno pozvati povjerioce likvidacionog dužnika da u istom roku prijave svoja potraživanja uz navođenje pravnog osnova po osnovu kojeg su ta potraživanja nastala.

(2) Ako u roku iz stava (1) ovog člana likvidacioni dužnik ne obavijesti sud o imovini ili obavijesti da nema imovine ili da je ona neznatne vrijednosti i ako nema prijavljenih potraživanja prema likvidacionom dužniku, sud donosi rješenje kojim utvrđuje da se

likvidacioni postupak neće provoditi i ujedno nalaže brisanje poslovnog subjekta iz sudskog registra nakon pravosnažnosti ovog rješenja.

(3) Rješenje se objavljuje na elektronskoj ploči suda ili internet stranici suda, te objava ovog rješenja ima učinak dostave rješenja likvidacionom dužniku.

#### Član 55.

(Prava i obaveze članova poslovnog subjekta nad kojim je utvrđen prestanak po službenoj dužnosti)

(1) Članovi poslovnog subjekta nad kojim je utvrđen prestanak po službenoj dužnosti mogu zatražiti da im sud, srazmjerno njihovom učešću u vlasništvu, prenese ostatak likvidacione mase poslovnog subjekta.

(2) Članovi poslovnog subjekta iz stava (1) ovog člana kojima se prenesen ostatak likvidacione mase poslovnog subjekta odgovaraju za obaveze poslovnog subjekta povjeriocima neograničeno solidarno svojom imovinom.

(3) Odgovornost prema povjeriocima iz stava (2) ovog člana prestaje protekom roka od tri godine od dana objave rješenja iz člana 54. stav (3) ovog zakona.

(4) Nakon pravosnažnosti rješenja iz člana 54. stav (3) ovog zakona, likvidacioni sud će to rješenje dostaviti registarskom sudu, koji će izvršiti brisanje poslovnog subjekta iz sudskog registra.

(5) Ostaci likvidacione mase koja se u skladu sa ovim članom ne prenesu članovima društva postaju vlasništvo općine ili ako je to propisano drugim posebnim propisom.

#### Član 56.

(Nastavak postupka po općim odredbama ovog zakona)

(1) Ako sud utvrdi da nisu ispunjeni uslovi za zaključenje likvidacionog postupka iz člana 54. stav (3) ovog zakona, postupak likvidacije će se nastaviti u skladu sa općim odredbama ovog zakona.

(2) Prije nastavka postupka po općim odredbama za provođenje likvidacionog postupka, sud će pozvati povjerioce koji su svoje potraživanje prijavili, da solidarno uplate predujam za pokriće troškova likvidacionog postupka u roku od 15 dana od dana dostavljanja poziva.

(3) Ukoliko povjerioci ne uplate predujam u propisanom roku, prijave potraživanja će se odbaciti, a postupak će se okončati u skladu sa odredbom člana 54. stav (2) ovog zakona.

(4) Povjerilac koji je predujmio troškove postupka ima pravo na njihov povrat, u postupku namirenja likvidacione mase. Troškovi koji su predujmljeni se namiruju prije namirenja potraživanja prijavljenih u likvidacionom postupku



**Član 57.**  
(Preostala imovina)

(1) Poslovnim subjektima kojima je utvrđen prestanak po službenoj dužnosti ili na osnovu odluke zbog ništavosti upisa, a nakon zaključenja likvidacionog postupka, preostalu imovinu sud će prenijeti na članove društva srazmjerno njihovom učešću u vlasništvu poslovnog subjekta.

(2) Preostala imovina iz likvidacione mase koja se ne prenese u skladu sa stavom (1) ovog člana postaje vlasništvo općine ili grada, ukoliko drugačije nije propisano posebnim propisom.

**Član 58.**  
(Nastavak postupka)

(1) Ako se utvrdi da likvidacioni dužnik ima imovine i da su povjerioci prijavili svoja potraživanja, sud će pozvati povjerioce da solidarno uplate predujam za pokriće troškova likvidacionog postupka u roku od 15 dana od dana dostavljanja poziva.

(2) Ukoliko povjerioci ne uplate predujam u propisanom roku, prijava potraživanja će se odbaciti, a postupak okončati na način propisan članom 54. stav (2) ovog zakona.

(3) Povjerilac koji je predujmio troškove postupka ima pravo na njihov povrat u postupku namirenja iz likvidacione mase.

(4) Ukoliko povjerioci predujme troškove likvidacionog postupka, postupak likvidacije će se provesti po odredbama ovog zakona koji propisuju dobrovoljnu likvidaciju.

## **VII -OSTALE ODREDBE**

**Član 59.**  
(Čuvanje poslovnih knjiga i dokumenata poslovnog subjekta nakon brisanja)

(1) Poslovne knjige i dokumenta poslovnog subjekta koje je brisano usljed likvidacije, čuvaju se u skladu sa propisima kojima se uređuje arhivska građa.

(2) Podaci o mjestu čuvanja građe i licu ovlaštenom za izdavanja dokumentacije i isprava, a kojem je povjereno čuvanje poslovnih knjiga i dokumenta, dostavljaju se u registar.

(3) Troškove arhiviranja namiruju se iz likvidacione mase.

(4) Ukoliko likvidacioni dužnik ne raspolaže sredstvima za pokrivanje troškova arhiviranja, arhivsku građu likvidator uručuje članu pravnog lica sa najvećim učešćem u vlasničkim udjelima ili drugom članu pravnog lica.

(5) Zainteresovano lice imaju pravo uvida u poslovne knjige i dokumenta poslovnog subjekta o svom trošku.

## **VIII - PRELAZNE I ZAVRŠNE ODREDBE**

Član 60.  
(Podzakonski propisi)

Federalni ministar pravde će u roku od tri mjeseca od dana stupanja na snagu ovog zakona donijeti:

- a) propis o izgledu i sadržaja obrasca prijedloga za pokretanje likvidacionog postupka i o izgledu i sadržaju obrasca prijedloga za pokretanja skraćenog dobrovoljnog likvidacionog postupak i obrasca izjave članova pravnog lica;
- b) propis o naknadama i nagradama za rad likvidatora.

Član 61.  
(Započeti postupci)

Postupci likvidacije koji su započeti do dana stupanja na snagu ovog zakona, okončat će se po odredbama zakona koji je bio na snazi u vrijeme njihovog pokretanja.

Član 62.  
(Dostava rješenja kojim je utvrđen prestanak po službenoj dužnosti)

Registarski sudovi obavezni su likvidacionom sudu dostaviti rješenja kojim je utvrđen prestanak po službenoj dužnosti, a radi provođenja postupka likvidacije po službenoj dužnosti na način propisan odredbama čl. 54 do 58. ovog zakona.

Član 63.

Stupanjem na snagu ovog zakona prestaje da važi Zakona o likvidacionom postupku („Službene novine Federacije BiH“, broj:29/03).

Član 64.

Ovaj zakon stupa na snagu osmog dana od dana objavljivanja u “Službenim novinama Federacije BiH”.

## **O B R A Z L O Ž E N J E**

### **ZAKON O LIKVIDACIONOM POSTUPKU**

#### **I – USTAVNI OSNOV**

Ustavni osnov za donošenje ovog zakona sadržan je u odredbi člana IV. C. 3. a u vezi sa članom IV. A. 20. (1) d), Ustava Federacije Bosne i Hercegovine, kojim je propisano da pravila postupka potrebna da bi se osigurala jednakost u postupanju kao i osnovni principi pravičnosti u postupcima pred sudovima i organizaciji svih sudova bit će utvrđeni zakonima Federacije. Obzirom da se ovim zakonom uređuju pravila likvidacionog postupka pred sudovima u Federaciji BiH navedena ustavna odredba predstavlja ustavni osnov za njegovo donošenje, pa je na osnovu člana IV. A. 20. (1) d) Ustava Federacije BiH, Parlament Federacije BiH nadležan za donošenje ovog zakona.

#### **II – RAZLOZI ZA DONOŠENJE ZAKONA**

Analizirajući postojeće zakonsko rješenje u oblasti provođenja likvidacionog postupka nad pravnim osobama u Federaciji BiH, te uzevši u obzir sve činjenice koje ukazuju na određene nedorečenosti u postojećim zakonskim odredbama, pristupilo se izradi potpuno novog Zakona o likvidacionom postupku. Kako bi došli do kvalitetnijeg zakonskog rješenja uzete su u obzir preporuke proizašle iz konkretnih slučajeva u sudskoj praksi, a posebno one koje se odnose na postojeće praznine i nedorečenosti u važećem zakonskom tekstu. Naime zakonski tekst koji se trenutno primjenjuje u Federaciji BiH donesen je 2003. godine i sadrži svega 17 odredaba, za koje se u dosadašnjoj primjeni pokazalo da nisu dostatne za rješavanje svih situacija u praksi, što je rezultiralo različitim postupanjem sudova u određenim pravnim situacijama.

Upravo radi otklanjanja uočenih nedostataka u dosadašnjoj praksi, predloženi zakonski tekst sadrži odredbe koje prepoznaju četiri vrste likvidacije i to: prinudnu likvidaciju, dobrovoljnu likvidaciju, likvidaciju po službenoj dužnosti i druge slučajeve utvrđene zakonom. Dakle, novim zakonskim rješenjima nastoje se urediti svi oblici likvidacija pravnih lica, te ubrzati i skratiti postupak u svim segmentima u kojima je to moguće, a da se pri tome izbjegniju zakonske nedorečenosti.

Nadalje, novim zakonskim rješenjem želi se zaokružiti sistem procesnih normi koje se primjenjuju prilikom provođenja likvidacionog postupka i otkloniti svaka dilema oko primjene drugih procesnih zakona u ovom postupku.

Treba naglasiti da se prethodno provedenim analizama o stanju sudskih registara poslovnih subjekata došlo se do saznanja da u Federaciji BiH egzistira znatan broj poslovnih subjekata u formalnom smislu. Naime, podaci ukazuju da navedeni poslovni subjekti već odavno ne obavljaju bilo kakve poslovne aktivnosti, pa čak ni podaci o zakonskim zastupnicima i drugim odgovornim osobama nisu validni. Postojanje takvih subjekata nema nikakav značaj za privredni razvoj i nepotrebno se vode u sudskim evidencijama. Upravo radi brisanja ovakvih poslovnih subjekata ovaj tekst zakona prepoznaje i takozvanu likvidaciju po službenoj dužnosti.

Nadalje, veoma je bitno naglasiti da potreba za postizanjem sadržajnog i praktičnog zakonskog rješenja u ovoj oblasti predstavlja korak ka ispunjenju ciljeva u otklanjanju pravnih i drugih prepreka za investiciona ulaganja u Federaciji Bosne i Hercegovine. Ovaj zakonski tekst dio je prioritete reforme koja se provodi radi otklanjanja ključnih

prepreka za investiciona ulaganja u Federaciji BiH, a koja bi u Federaciju BiH donijela znatna novčana sredstva kao i nova radna mjesta, pa se predlaže da Predstavnički dom i Dom naroda Parlamenta Federacije Bosne i Hercegovine zaključkom utvrde prihvatanje Nacrta zakona o likvidacionom postupku u predloženom tekstu.

### III - OBRAZLOŽENJE PREDLOŽENIH ZAKONSKIH RJEŠENJA

Nacrt zakona o likvidacionom postupku je podijeljen u osam tematskih cjelina, odnosno glava i to: I-Osnovne odredbe, II-Organi likvidacionog postupka, III-Opće procesne odredbe, IV-Tok likvidacionog postupka –dobrovoljna likvidacija, V-Skraćeni, dobrovoljni likvidacioni postupak, VI-Likvidacija po službenoj dužnosti, VII- Ostale odredbe i VIII-Prijelazne i završne odredbe.

Glava I pod, nazivom Osnovne odredbe obuhvata članove od 1. do 9., kojima se propisuje predmet zakona. U članu 1. Nacrta zakona definisano je da je likvidacioni postupak postupak koji se vodi pred nadležnim sudovima u Federaciji Bosne i Hercegovine, radi likvidacije pravnog lica.

Članom 2. Nacrta zakona definiše se svrha i predmet likvidacionog postupka, koji kako je definisano služi potpunom namirenju svih povjerilaca pravnog lica, unovčenjem njegove imovine.

Članom 3. Nacrta zakona određuje se nadležni sud koji provodi postupak likvidacije.

U članu 4. Nacrta zakona propisuje se shodna primjena odredaba zakona o stečaju, u slučaju da ovim zakonom nisu propisane određene pravne situacije i u tom smislu se sistem procesnih normi zaokružuje u postupku likvidacije, s tim što je precizirano koje odredbe iz zakona o stečaju nisu primjenjive u postupku likvidacije.

Član 5. Nacrta zakona predstavlja značajnu novinu ovog zakona jer definiše vrste likvidacionih postupaka, pa tako imamo prinudnu likvidaciju, dobrovoljnu likvidaciju, likvidaciju po službenoj dužnosti i druge slučajeve utvrđene zakonom.

Članom 6. Nacrta zakona definiše se prinudna likvidacija koja se pokreće ako je pravnom licu izrečena mjera zabrane obavljanja djelatnosti pravosnažnim rješenjem nadležnog organa ili rješenjem suda zbog neispunjavanja uslova za obavljanje djelatnosti, a u roku određenom u izrečenoj mjeri ne ispuni te uslove, odnosno ne promijeni djelatnost ili je izrečena mjera trajne zabrane obavljanja djelatnosti, te se definiše ko je nadležan da pokreće prinudnu likvidaciju.

Članom 7. Nacrta zakona definiše se dobrovoljna likvidacija, koja se provodi na osnovu odluke skupštine pravnog lica i po prijedlogu za pokretanje koji podnosi član društva ili zakonski zastupnik.

Članom 8. Nacrta zakona propisuje se likvidacioni postupak po službenoj dužnosti u slučaju kada je likvidacionom sudu dostavljeno pravosnažno rješenje registarskog suda kojim je utvrđen prestanak nakon isteka roka na koje je društvo osnovano ili društvo nije izvršilo usklađivanje sa Zakonom o privrednim društvima ili ako je pravosnažnom odlukom suda utvrđena ništavost upisa osnivanja u sudski registar pravnog lica.

Članom 9. Nacrta zakona propisano je pokretanje likvidacije u drugim slučajevima utvrđenim zakonom na prijedlog koji podnose subjekti određeni tim zakonom.

Glava II Nacrta zakona obuhvata članove od 10. do 20. i definiše organe likvidacionog postupka.

Čl. 10. i 11. Nacrta zakona utvrđuju se organi likvidacionog postupka i to likvidacioni sudija i likvidator. Likvidacioni sudija vodi i upravlja likvidacionim postupkom od

podnošenja prijedloga za provođenje likvidacionog postupka do zaključenja likvidacionog postupka, imenuje i razrješava likvidatora, te vrši pravni nadzor nad njim, u skladu sa odredbama ovog Zakona.

Čl 12. i 13. Nacrta zakona definisano je ko može biti imenovan za likvidatore i prava likvidatora, odnosno definisano je da sud može imenovati: članove uprave društva upisane u sudski registar poslovnih subjekata na prijedlog predlagača ili stečajne upravnike sa liste stečajnih upravnika Federacije BiH, te da likvidator stiče svojstvo zakonskog zastupnika pravnog lica danom donošenja rješenja o imenovanju.

Članom 14. Nacrta zakona propisane su obaveze likvidatora. Jasno je definisano koja dokumenta je likvidator dužan odmah nakon stupanja na dužnost, a u roku od 30 dana od dana imenovanja, dostaviti sudu.

Članom 15. Nacrta zakona utvrđeno je kada će sud razriješiti likvidatora, a u članu 16. da likvidator ima pravo na naknadu troškova i nagradu za rad, ukoliko nije član društva u skladu sa Pravilnikom o nagradama i naknadama za likvidatore, koji donosi Federalno ministarstvo pravde.

Član 17. Nacrta zakona propisuje da likvidator lično odgovara za skrivenu povredu svoje obaveze da imovinu unovči što je najbolje moguće i prikupljeni iznos podijeli povjeriocima, a u članu 18. propisuje se obaveza likvidatoru na polaganje računa o radnjama i obaveza da na traženje suda, ali najkasnije sa okončanjem postupka diobe, položi račun o svojim radnjama i sudu preda pismene potvrde na provjeru.

U članu 19. Nacrta zakona propisuje se odgovornost za štetu povjeriocima koju im je likvidator svojim radnjama prouzrokovao.

Glava III sadrži opće procesne odredbe, koje se primjenjuju na sve vrste likvidacionih postupaka, a to su odredbe o nadležnosti suda, zatim hitnosti postupka, vrstama odluka suda, pravo na žalbu, koja se može izjaviti u roku od osam dana, zatim se definiše način rečunanja rokova za žalbu sa akcentom na objeve rješenja, gdje se uvodi način objave na internet stranici suda. Ove odredbe obuhvaćene su čl. 20. do 22. Nacrta zakona.

Glava IV propisuje tok likvidacionog postupka kroz dobrovoljnu likvidaciju i po svom obimu je najveća. Obuhvaća članove od 23. do 48. Nacrta zakona.

U članu 23. definiše se način pokretanja postupka dobrovoljne likvidacije podnošenjem prijedloga nadležnom sudu.

U članu 24. Nacrta zakona propisuje se koje odluke nadležnih organa se dostavljaju sudu uz prijedlog za pokretanje postupka, a to su odluka o prestanku poslovnog subjekta ili pravosnažno rješenje nadležnog organa kojim je izrečena zabrana obavljanja djelatnosti, ili rješenje nadležnog registarskog suda kojim je utvrđen prestanak ili pravosnažnu odluku nadležnog organa kojom je utvrđen prestanak.

U članu 25. propisuje se dokumentacija koja se podnosi uz prijedlog za pokretanje likvidacionog postupka, a koju čine: aktuelni izvod iz sudskog registra, uvjerenje Poreske uprave o izmirenim poreskim obavezama, ne starije od 15 dana od dana ponošenja prijedloga za pokretanje likvidacionog postupka, uvjerenje Uprave za indirektno oporezivanje BiH o izmirenim, indirektnim poreskim obavezama, ne starije od 15 dana od dana ponošenja prijedloga za pokretanje likvidacionog postupka, potvrda Centralne banke BiH, ne starije od osam dana od dana podnošenja, prijedloga za pokretanje likvidacionog postupka o solventnosti transakcijskog računa poslovnog subjekta i finasijske izvještaje o poslovanju.

Članom 26. Nacrta zakona propisan je način postupanja suda po neuređenom prijedlogu i u slučaju da nije dostavljena potrebna dokumentacija uz prijedlog, odnosno

ukoliko predlagač ne postupi po nalogu suda u određenom roku, sud će rješenjem prijedlog odbaciti.

Članom 27. Nacrta zakona propisano je da nadležni likvidacioni sud može izmijeniti svoje rješenje ako su uz žalbu priloženi dokumenti i isprave kojima se ispunjavaju uslovi iz člana 24. i 25. ovog zakona.

Članom 28. Nacrta zakona propisuje se obaveza predlagača na uplatu predujama u iznosu koji odredi sud za pokriće troškova postupka, te u slučaju da predlagač ne uplati predujam u roku od 8 dana, likvidacioni sudija će rješenjem odbaciti prijedlog.

Članom 29. Nacrta zakona propisuje se donošenje rješenje o otvaranju likvidacionog postupka i sadržaj tog rješenja.

Članom 30. Nacrta zakona precizira se da pravne posljedice otvaranja likvidacionog postupka nastupaju danom donošenja rješenja o otvaranju likvidacionog postupka, kada se prekidaju se svi postupci u kojima je likvidacioni dužnik stranka u postupku i prestaju ovlaštenja licima ovlaštenim za zastupanje.

Članom 31. Nacrta zakona propisuje se u kojim slučajevima sud obustavlja postupak i na koji način.

Član 32. Nacrta zakona propisuje se način ispitivanja prijava potraživanja, odnosno zakazivanje ispitnog ročišta kada će se likvidator izjasniti da li priznaje potraživanje ili ga osporava, te ukoliko je prijava potraživanja osporena od strane likvidatora, propisuje se obaveza suda da uputi povjerioca da može pokrenuti parnicu radi utvrđenja osnovanosti potraživanja, u roku od 15 dana od dana održavanja ročišta za ispitivanje potraživanja.

Članom 33. Nacrta zakona propisano je da ako se niko od povjerilaca ne prijavi u ostavljenom roku, na prijedlog likvidatora i nakon što likvidator da izjavu kojom jamči da likvidacioni dužnik nema obaveza, sud će zaključiti likvidacioni postupak.

Članom 34. Nacrta zakona propisuje se obaveza likvidatora da bez odlaganja uđe u posjed imovine pravnog lica, te se jasno precizira da je likvidator ovlašten i obavezan na unovčenje imovine, te da će prije unovčenja imovine izvršiti procjenu nekretnina i pokretnih stvari značajnije vrijednosti, putem ovlaštenog sudskog vještaka.

Članom 35. propisan je način unovčenja nepokretnosti bez tereta na način da se prodaja nepokretnosti koje nisu opterećene teretima (slobodna imovina) vrši javnim nadmetanjem, javnim prikupljanjem ponuda i neposrednom pogodbom.

Članom 36. Nacrta zakona propisuje se unovčavanje nepokretnosti sa teretima sa precizno definisanom procedurom provođenja postupka prodaje, koja se nadalje definiše u čl. 37 i 38. kod zaključivanja ugovora i brisanja tereta i obezbjeđenja prodaje.

Član 39. Nacrta zakona propisuje se prodaja pokretnih stvari, a u članu 40. način unovčavanja pokretnih stvari i prava na kojima postoji razlučno pravo uz obavezu na obavijest o namjeri otuđenja koja se propisuje u članu 41. Nacrta zakona.

U članu 42. Nacrta zakona propisuje se podjela ostvarenog iznosa kod pokretnih stvari na kojim postoji razlučno pravo na način da se ostvareni iznos od prodaje najprije koristi za namirenje troškova likvidacionog postupka, a ostatak ostvarenog iznosa koristi se za namirenje razlučnih povjerilaca bez odgađanja.

Članom 43. Nacrta zakona propisuje se zaštita povjerioca od odugovlačenja unovčavanja na način da ako je likvidator ovlašten za unovčavanje stvari na kome postoji razlučno pravo i ako namjerno odugovlači unovčavanje nakon ročišta, na prijedlog razlučnog povjerica će se iz likvidacione mase nadoknaditi gubitak vrijednosti njegovog udjela u unovčavanju.

U članu 44. Nacrta zakona propisuje se način unovčavanja pokretnih stvari na kojima postoji razlučno pravo od strane povjerioca, a u članu članu 45. postupak diobe na način da je iz likvidacione mase likvidator dužan prvo izmiriti troškove likvidacionog

postupka, zatim ukoliko su potraživanja povjerilaca za koje ne postoji izvršni naslov sporna, sud tog povjerioca upućuje da pokrene parnicu radi utvrđivanja osnovanosti potraživanja, u roku od 15 dana od dana održavanja ročišta za ispitivanje potraživanja. Ako povjerilac u ostavljenom roku pokrene parnicu, likvidator je dužan prilikom diobe obezbijediti sredstva radi eventualne isplate te obaveze, a ukoliko povjerilac u ostavljenom roku ne pokrene parnicu, njegovo se potraživanje prilikom diobe neće uzeti u obzir i smatrat će se da se povjerilac odrekao ovog prava.

Nadalje, likvidator nakon unovčenja imovine, u potpunosti namiruje potraživanja svih povjerilaca ukoliko je likvidaciona masa dovoljna za namirenje svih potraživanja, međutim ukoliko likvidator na osnovu prijavljenih potraživanja utvrdi da imovina poslovnog subjekta nije dovoljna da se podmire sva potraživanja povjerilaca, likvidator je dužan predložiti da se postupak likvidacije obustavi i pokrene stečajni postupak.

U članu 46. Nacrta zakona propisana je obaveza podnošenja izvještaja i polaganje računa od strane likvidatora, a nakon okončanog postupka diobe.

U članu 47. Nacrta zakona propisuje se donošenje rješenja o zaključenju likvidacionog postupka, a u članu 48. brisanje iz registra poslovnog subjekta nakon pravosnažnosti tog rješenja.

Glava V pod nazivom skraćeni dobrovoljni likvidacioni postupak sadrži odredbe kojima se propisuje provođenje likvidacionog postupka po skraćenoj proceduri, a predlažu se u cilju pojednostavljenja i ekonomičnosti samog postupka likvidacije kada imamo pravnu situaciju iz koje proizilazi da provođenje redovnog postupka nije neophodno.

Članovima 49. do 53. propisuje se postupak dobrovoljne skraćene likvidacije koja započinje prijedlogom za ovakav vid likvidacije uz koji moraju biti dostavljeni: odluka o dobrovoljnoj likvidaciji u skraćenom postupku, notarski ovjerenu izjavu ortaka, članova ili dioničara da su izmirene sve obaveze prema povjeriocima, uključujući obaveze prema radnicima i da se slažu sa time da bude proveden skraćeni dobrovoljni likvidacioni postupak, aktuelni izvod iz sudskog registra, potvrdu Centralne banka BiH ne starije od osam dana od dana ponošenje prijedloga za pokretanje skraćenog dobrovoljnog likvidacionog postupka, uvjerenje Poreske uprave o izmirenim poreskim obavezama ne starije od 15 dana od dana ponošenje prijedloga za pokretanje skraćenog dobrovoljnog likvidacionog postupka, uvjerenje Uprave za indirektno oporezivanje BiH o izmirenim indirektnim poreskim obavezama ne starije od 15 dana od dana ponošenje prijedloga za pokretanje skraćenog dobrovoljnog likvidacionog postupka, posljedni finansijski izvještaj sačinjen i prezentovan u skladu sa zakonom kojim se reguliše računovodstvo i reviziju, izjavu ortaka, članova ili dioničara o popisu imovine sa dokazima, uz prijedlog raspodjele imovine prema vlasničkim udjelima, dokaz o uplaćenim sredstvima na ime objave oglasa o donošenju rješenja o otvaranja i zaključenju likvidacionog postupka u „Službenom novinama Federacije BiH“ i akt nadležnog organa kojim je dato ovlaštenje licu koje će preduzimati radnje i primati pismena u skraćenom dobrovoljnom likvidacionom postupku.

U članu 50. Nacrta zakona propisano je da sud nakon što utvrdi da su ispunjeni uslovi iz člana 48. ovog zakona, donosi rješenje o otvaranju i istovremenom zaključenju likvidacionog postupka, te po pravosnažnosti istog nalaže brisanje društva iz registra, rješenje se objavljuje na oglasnoj tabli suda, a oglas o donošenju rješenja o otvaranju i istovremenom zaključenju likvidacionog postupka objavljuje u „Službenom novinama Federacije BiH“, uz napomenu da je rješenje objavljeno na oglasnoj tabli suda u neprekidnom trajanju od 30 dana. Povjerioci i druga lica koja imaju pravni interes, mogu izjaviti žalbu u roku od 30 dana u skladu sa članom 22. ovog zakona. Ako se na rješenje uloži žalba sud će staviti van snage rješenje u cijelosti i isto objaviti na oglasnoj tabli suda, dok se oglas o odluci suda objavljuje u „Službenom novinama

Federacije BiH“ uz napomenu da je rješenje objavljeno na oglasnoj tabli suda u neprekidnom trajanju od 30 dana.

Nakon toga dolazi do nastavka redovnog likvidacionog postupka u skladu sa odredbom člana 51.

U članu 52. Nacrta zakona propisana je odgovornost lica koja su dala ovjerenu izjavu iz člana 48. stav (1) tačka 2) ovog zakona, na način da odgovaraju neograničeno solidarno za obaveze pravnog lica tri godine nakon brisanja iz registra, a društvo koje prestaje po skraćenom postupku, briše se iz registra uz upisivanje u registar ličnih imena, jedinstvenog matičnog broja i adresa članova društva fizičkih lica, odnosno naziva, sjedišta i matičnog broja članova pravnih lica, s naznačenjem neograničene solidarne odgovornosti za obaveze brisanog društva, u roku iz stava (1) ovog člana.

Članom 53. Nacrta zakona propisuje se raspodjela likvidacione mase na način da se likvidaciona masa po pravosnažnosti rješenja iz člana 49. stav (1) ovog zakona raspodjeljuje članovima prema vlasničkim udjelima, ukoliko članovi nisu donijeli odluku o raspodjeli likvidacione mase, kada će se masa raspoređivati u skladu sa odlukom o raspodjeli likvidacione mase.

Odredbama u Glavi VI propisana je likvidacija po službenoj dužnosti to u čl. 54-58. gdje se propisuje nakon dostave likvidacionom sudu rješenja kojim je utvrđen prestanak ili utvrđena ništavost upisa osnivanja poslovnog subjekta sud će u roku od 15 dana od dana prijema rješenja oglasom pozvati likvidacionog dužnika da u roku od 30 dana od dana objave oglasa obavijesti sud o imovini i ujedno pozvati povjerioce likvidacionog dužnika da u istom roku prijave svoja potraživanja uz navođenje pravnog osnova po osnovu kojeg su ta potraživanja nastala.

U članu 55. Nacrta zakona propisuju se prava i obaveze članova poslovnog subjekta nad kojim je utvrđen prestanak po službenoj dužnosti. Naime, isti mogu zatražiti da im sud, srazmjerno njihovom učešću u vlasništvu, prenese ostatak likvidacione mase poslovnog subjekta. Članovi poslovnog subjekta iz stava (1) ovog člana kojima se prenesen ostatak likvidacione mase poslovnog subjekta odgovaraju za obaveze poslovnog subjekta povjeriocima neograničeno solidarno svojom imovinom. Odgovornost prema povjeriocima iz stav 2 ovog člana prestaje protekom roka od tri godine od dana objave rješenja.

U članu 56. Nacrta zakona predviđeno je da ukoliko sud utvrdi da nisu ispunjeni uslovi za zaključenje likvidacionog postupka iz člana 50. stav (2) ovog Zakona, postupak likvidacije će se nastaviti u skladu sa općim odredbama ovog Zakona.

Član 57. Nacrta zakona propisuje da će sud preostalu imovinu nakon zaključenja likvidacionog postupka, prenijeti na članove društva srazmjerno njihovom učešću u vlasništvu poslovnog subjekta, a u slučaju da se preostala imovina iz likvidacione mase ne prenese u skladu sa stavom (1) ovog člana, ista postaje vlasništvo općine ili grada, ukoliko drugačije nije propisano posebnim propisom.

Članom 58. Nacrta zakona propisuje se nastavak postupka ako se utvrdi da likvidacioni dužnik ima imovine i da su povjerioci prijavili svoja potraživanja, po proceduri za redovni postupak likvidacije, odnosno dobrovoljne likvidacije po skraćenom postupku ukoliko su ispunjeni uslovi predviđeni zakonom.

U Glavi VII – sadržane su ostale odredbe i to u članu 59. čuvanje poslovnih knjiga i dokumenata pravnog lica nakon brisanja, kojima se utvrđuje da se poslovne knjige i dokumenta poslovnog subjekta koje je brisano usljed likvidacije, čuvaju u skladu sa propisima kojima se uređuje arhivska građa, a podaci o mjestu čuvanja građe i licu ovlaštenom za izdavanja dokumentacije i isprava, kojem je povjereno čuvanje poslovnih knjiga i dokumenta, upisuje se u registar. Troškove arhiviranja namiruju se iz likvidacione mase, a ukoliko likvidacioni dužnik ne raspolaže sredstvima za pokrivanje



troškova arhiviranja, arhivsku građu likvidator uručuje članu pravnog lica sa najvećim učešćem u vlasničkim udjelima ili drugom članu pravnog lica. Zainteresovano lice imaju pravo uvida u poslovne knjige i dokumenta poslovnog subjekta o svom trošku.

U Glavi VIII sadržane su prelazne i završne odredbe kojim se propisuje rok za donošenje podzakonskih propisa iz ovog zakona, način završetka započetih postupaka i stupanje na snagu zakona.

#### **IV- FINANSIJSKA SREDSTVA**

Za provođenje ovog zakona nije potrebno osigurati dodatna sredstva u budžetu Federacije Bosne i Hercegovine.